

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-40-Z/24
Kakanj, 29.04.2024. godine

Z A P I S N I K
sa 40. redovne sjednice Općinskog vijeća održane 29.04.2024. godine (ponedjeljak)
u sali Općinskog vijeća sa početkom u 09:00 sati
(sažetak zapisnika)

Predsjedavajući Općinskog vijeća Slaven Katičić je pozdravio prisutne i otvorio 40. redovnu sjednicu Općinskog vijeća.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Mediha Mamela, Džemal Bečirhodžić, Safet Šahman, Nerma Aliefendić, Omer Musić, Namir Talić, Adis Mrkonjić, Amar Selimović, Izudin Hrusto (naknadno pristupio), Elvir Delibašić i Mejrema Purišević (**SDA**)

Vinka Aletović, Miroslav Spasojević i Edin Šljivo (**SDP BiH**)

Dževdet Huskić i Branko Češljic (**NS**)

Enver Merdić (naknadno pristupio) (**SBB BiH**)

Armin Bašić (**DF**)

Sabit Čehajić (**S BiH**)

Slaven Katičić (**HDZ BiH**)

Mujo Fafulić - (**nacionalna manjina**)

Mirsad Tursum, Zerina Kovač i Fakir Ajdinović (**samostalni vijećnici**)

Odsutni vijećnici: Kenan Kozlo i Alen Josipović (**SDA**), Ahmed Begić (**SDP BiH**), Marcela Ravlija (**NS**), Adnan Čobo (**DF**) i Mugdin Gorak (**SBB BiH**)

Predsjedavajući je konstatovao da je na sjednici u momentu prijave prisutno 22 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Mirnes Bajtarević, općinski načelnik

Emir Zaimović, sekretar Općinskog vijeća – po ovlaštenju

Džihad Berbić, pomoćnik općinskog načelnika za finansije

Edin Aliefendić, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurudin Hrusto, pomoćnik općinskog načelnika za civilnu zaštitu

Bahrudin Arnaut, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

Mukades Delibašić, pomoćnik općinskog načelnika za imovinskopravne, geodetske poslove i katastar nekretnina

Zijad Neimarlija, direktor Zavoda za planiranje i izgradnju općine Kakanj

Mahir Sikira, šef Stručne službe za poslove Općinskog načelnika

Izviestioci, obrađivači, gosti

Sanda Hasagić-Terzić, predsjednica UO i **Senad Čišija**, direktor JU „Gradska biblioteka“ Kakanj
Iso Zaimović, ispred „Trgošped“ d.o.o. Kakanj
Nedžad Rožajac, ispred „Modus Projekt“ d.o.o. Kakanj

Predstavnici medija

NTV IC Kakanj
Radio Kakanj

Napomene o radu Kolegija Općinskog vijeća

U pripremi 40. redovne sjednice Općinskoga vijeća, Kolegij Općinskog vijeća je 22.04.2024. godine, održao sjednicu na kojoj je razmatrao:

a) Zahtjev za pristup informacijama Fondacije Atelje

Kolegij je zahtjev proslijedio JP „Vodokom“ d.o.o. Kakanj na postupanje.

b) Odgovor Odsjeka za inspekcije na Zaključak Kolegija, broj: 01/1-37-K-106/24 u vezi Građanske inicijative građana MZ Doboj za rješavanje probelma u vezi odvijanja saobraćaja na području MZ Doboj

Kolegij je odgovor primio k znanju.

c) Zahtjev Savjeta MZ Plandište za donošenje odluke o zabrani odlaganja animalnog i opasnog otpada na deponiju „Bare“

Zahtjev je proslijeđen JP „Vodokom“ d.o.o. Kakanj na očitovanje i izvještavanje Kolegija o ovoj problematici.

Usvajanje zapisnika sa 39. redovne sjednice Općinskog vijeća

Nije bilo diskusije po zapisniku i isti je usvojen sa 20 glasova ZA, bez glasova PROTIV i 2 glasa UZDRŽAN.

Komentari na dostavljene odgovore na vijećnička pitanja

Dževdet Huskić: je komentarisao odgovor Vodokoma na postavljeno pitanje oko drugačijeg načina obračuna isporučene vode domaćinstvima i rekao da se u odgovoru navode razlozi zašto nije prihvatljiv drugačiji način obračuna. Između ostalog se navodi da su plaće radnika Vodokoma manje za 400 KM od federalnog prosjeka, u vezi čega je rekao da bi volio imati podatak koliko iznose plaće članova Uprave tog JP i u kakvom su one odnosu sa federalnim prosjekom.

Komentari na dostavljena mišljenja na vijećničke inicijative

Armin Bašić: je komentarisao odgovor na inicijativu upućenu Vodokomu u vezi iznalaženja načina za odvoz luga i kabastog otpada. U odgovoru stoji da postoji Odluka iz 2017. godine kojom je regulisana predmetna problematika, ali ista Odluka ima svoje manjkavosti i nedostatke, te je neprimjenjiva. Uz to se navodi da bi trebalo provesti anketiranje stanovništva po tom pitanju. Izrazio je čuđenje zbog saznanja da je tek sada uočena manjkavost Odluke donesene prije 7 godina i rekao je da je nužno što prije učiniti nešto po tom pitanju i prije naredne grejne sezone riješiti navadeni problem.

Mirsad Tursum: je komentarisao inicijativu koju je podnio vijećnik Čehajić, koja se odnosi na kontrolu odlaganja medicinskog otpada u JU Dom zdravlja Kakanj, a zbog situacije da je sa kamiona Vodokoma prilikom transporta na gradsku deponiju došlo do rasipanja medicinskog otpada u naselju Plandište. Rekao je da su inicijative vijećnika Čehajića tendenciozne i lažne, da imaju za cilj obmanjivanje javnosti, a da je cilj konkretne inicijative bio narušavanje ugleda Doma zdravlja i njegovih radnika. Istakao je da je po inicijativi izvršen inspeksijski pregled od strane kantonalnog zdravstvenog inspektora i da je tom prilikom utvrđeno da Dom zdravlja Kakanj sa medicinskim otpadom postupa u skladu sa Planom

upravljanja medicinskim otpadom. Također, utvrđeno je da se medicinski otpad odvaja od ostalog komunalnog otpada i da se odlaže na propisan način. U prilog tvrdnji da se radi o tendencioznoj inicijativi govori i činjenica da prijava nije upućena Vodokomu, sa čijeg kamiona je spao otpad, nego se isti obratio kantonalnoj inspekciji i Ministarstvu zdravstva ZDK za kontrolu u Domu zdravlja. Rekao je da Dom zdravlja nije jedina ustanova koja pruža određene usluge prilikom kojih nastaje sporni otpad, a što je potvrdio i inspektor u svome rješenju gdje navodi da se ne može utvrditi kome isti pripada. Na kraju je rekao da je Dom zdravlja morao provesti sve procedure i usvojiti odgovarajuće akte, u vezi predmetne problematike, kako bi dobio AKAZ certifikat, te da je zanemariva cijena koju Dom zdravlja plaća KB Zenica za odlaganje medicinskog otpada, odnosno da je znatno manja ta cijena od cijene koja se plaća Vodokomu za odlaganje ostalog komunalnog otpada. Zbog svega će Dom zdravlja radi nanesene štete podnijeti tužbu protiv imenovanog vijećnika.

Vinka Aletović: je komentarisala odgovor Zavoda na inicijativu u vezi problema sa kanalizacijom u naselju Rošćevina i zahvalila se Zavodu na podršci, te izrazila nadu da će u skorije vrijeme biti riješeni problemi u tom naselju.

Sabit Čehajić: je komentarisao diskusiju vijećnika Tursuma i istu ocijenio drskom i bahatom, te rekao da ne priliči vijećniku, zamjeniku predsjedavajućeg Vijeća i direktoru Doma zdravlja. Rekao je da je u naselju Plandište bilo rasuto 300-400 šprica sa iglama, a da je na kartonu pisalo Dom zdravlja. Na upit upućen Vodokomu u vezi toga je odgovoreno da su prevozili otpad iz Doma zdravlja. Naglasio je da mu je namjera bila da se takve i slične situacije više ne dešavaju zbog mogućnosti nastanka zaraze, a radi velike koncentracije djece na tom području.

Dževdet Huskić: je komentarisao odgovor na inicijativu za uređenje parking prostora u blizini zgrade ST-1 u kojem je navedeno da je prema Regulacionom planu na tom prostoru planirana zelena površina, šetalište i slično. S toga je pitao zašto se ne postupa po Regulacionom planu i prostor ne uredi na planirani način, odnosno ako se isti već koristi kao parking zašto se onda parking ne uredi na odgovarajući način. Napomenuo je da je ista situacija bila i sa inicijativom u vezi uređenja prostora iza tržnog centra BEST, pa je rekao da se treba odlučiti da li će se postupati po Regulacionom planu ili neće. Još je izrazio čuđenje zbog činjenice da je na stolu pred početak sjednice zatekao odgovor na pitanje upućeno Grijanju da se od sljedeće sezone razmotri mogućnost skraćivanja sezone grijanja na 6 mjeseci, a isti je sačinjen 15. aprila.

Vijećnička pitanja

Safet Šahman: je postavio vijećničko pitanje kakav je trenutni status ugovora za sanaciju puta u naseljenom mjestu Varalići? Napomenuo je da su u Programu za 2024. godinu sredstva planirana i ugovor potpisan, pa ga zanima kada će doći do realizacije sredstava.

Dževdet Huskić: je postavio dva vijećnička pitanja. Prvo je u da li je u planu rekonstrukcija puta prema Brusu od bivše diskoteke „Ara“, a nakon pojačanog prometa teških kamiona? Istakao je da je posljednjih dana intenziviran promet velikih kamiona na navedenoj dionici, koji potpuno uništava ionako dotrajali asfalt, pa ga zanima da li je poznat razlog pojačanog prometa teških kamiona i da li je planirana rekonstrukcija asfalta na toj dionici. Drugo pitanje je koliko novih parking mjesta je izgrađeno u široj gradskoj jezgri i dato na korištenje građanima u protekle 3 godine? Problem sa parkingom u gradu je višegodišnji problem zbog nedovoljnog broja parking mjesta i sve češća pojava je nepropisno parkiranje, te ga zanima koliko je novih parking mjesta izgrađeno u široj gradskoj jezgri u protekle 3 godine.

Sabit Čehajić: je postavio dva vijećnička pitanja. Prvo pitanje je kada je planiran završetak saobraćajnice, ulice Dobrovoljnih davalaca krvi, odnosno kružnog toka kod zgrade Općinskog suda? Drugo pitanje je kada će početi procedura povrata u posjed parcela vlasnicima koje su izostavljene avio snimanjem, a koje nisu uvedene po novom premjeru u katastar, te su iste u zemljišnoknjižnom uredu upisane kao privatno vlasništvo? Smatra da bi nadležna općinska služba trebala pokrenuti proceduru dopunskog premjera, kao druge općine koje rješavaju ovakav problem, a samim tim bi smanjili troškove građanima da svoja prava ostvaruju u sudskim procesima.

Edin Šljivo: je postavio vijećničko pitanje do kada će se čekati i da li postoje neki tehnički problemi sa javnom rasvjetom u naselju Gornji Tičići? Naime, već nekoliko mjeseci je prošlo od postavljanja rasvjetnih tijela u MZ Donji Kakanj, tačnije u zaseoku Tičići, od kojih su neka puštena u funkciju, dok nekoliko rasvjetnih tijela u Gornjim Tičićima još uvijek nije u funkciji.

Vijećničke inicijative

Dževdet Huskić: je pokrenuo dvije vijećničke inicijative. Prva inicijativa je za rekonstrukciju mosta preko željezničke pruge u nastavku ulice Vehbije Kulovića prema plavoj pasareli i OŠ „15. april“ u Doboju. Most je u jako lošem stanju i prelazak preko mosta predstavlja opasnost i pješacima i vozačima. Mještani održavaju most onoliko koliko je u njihovoj moći, ali je došlo vrijeme da se ozbiljno razmisli o njegovoj temeljitoj rekonstrukciji. Predlaže da se predmetna lokacija obiđe i utvdi stanje, te da se rekonstrukcija mosta uvrsti u program utroška sredstava Zavoda za planiranje i izgradnju, ukoliko se finansiranje rekonstrukcije ne može obezbijediti na drugi način. Druga inicijativa je da odgovorno lice iz Grijanja podnese detaljan izvještaj Općinskom vijeću o stanju s javnom rasvjetom na prostoru općine. S obzirom da je Grijanje prošle godine preuzelo obavezu održavanja javne rasvjete na području općine Kakanj, predlaže da se Općinskom vijeću dostavi izvještaj o dosadašnjim aktivnostima preduzeća po ovom pitanju, jer se ne može steći dojam da se stanje sa ispravnošću rasvjetnih tijela značajno, ili ikako popravlja.

Armin Bašić: je pokrenuo vijećničku inicijativu za postavljanje saobraćajnih znakova „zabrana skretanja u desno“ i „zabrana polukružnog okretanja“ u ulici V divizije NOP-a, tačnije na raskrsnici sa ulicom 309. brdske brigade, koja je nedavno rekonstruisana. Nakon rekonstrukcije ulice 309. brdske brigade došlo je do proširenja ulice i izmjene saobraćaja, pri čemu se sada vozila kreću lijevom saobraćajnom trakom. Ovo predstavlja problem pri izlazu iz ove ulice, jer ne postoji nikakva signalizacija da se radi o križanju sa jednosmjernom ulicom i nerijetko se dešava da vozači uđu u jednosmjernu ulicu, te su prisiljeni vožnjom unazad izaći.

Safet Šahman: je pokrenuo vijećničku inicijativu za održavanje zajedničkog sastanka između Općinskog načelnika, direktora Doma zdravlja Kakanj i šefova općinskih službi sa predstavnicima MZ Krševac, a vezano za rješavanje statusa ambulante Krševac.

Vinka Aletović: je pokrenula vijećničku inicijativu za postavljanje stacionarnog uređaja – radara u Ulici branilaca (dionica od zgrade Općine do autopraonice Kaoma). Građani općine Kakanj već duže vrijeme upozoravaju da na predmetnoj dionici nesavjesni vozači često voze neprilagođenom brzinom, te je podsjetila da su se u kratkom vremenskom periodu dogodile dvije saobraćajne nesreće na tom dijelu puta.

Predsjedavajući je konstatovao da su vijećnici: Mejrema Purišević, Adis Mrkonjić, Branko Češljčić, Amar Selimović, Namir Talić, Sabit Čehajić i Edin Šljivo podnijeli inicijativu bez korištenja govornice.

Mejrema Purišević: je pokrenula vijećničku inicijativu za sufinansiranje MammaPrint testa. MammaPrint test je ključan genetski test koji pruža detaljnu analizu 150 gena povezanih sa karcinomom dojke. Test je od suštinskog značaja jer omogućava određivanje biološke agresivnosti tumora. Zasnivajući se na rezultatima, može se informisano odlučiti o potrebi za kemoterapijom ili o mogućnosti njenog izbjegavanja bez štete za pacijentice. Također, MammaPrint je klinički validan, odobren od FDA i podržan rigoroznim kliničkim studijama, što ga čini popuzdanim alatom za ljekare i pacijente. Primjer pozitivne prakse je prisutan u Sarajevskom i Unsko-sanskom kantonu.

Adis Mrkonjić: je pokrenuo dvije vijećničke inicijative. Prva je da se izvrši postavljanje saobraćajnog ogleдалa na raskrsnici kod džamije u Donjem Kakanju. Navedena raskrsnica je nepregledna za skretanje iz pravca Kakanj - Donji Kakanj. Druga inicijativa je da se izvrši asfaltiranje dijela puta Kakanj-Tršće u kamenolomu. Naime, na navedenoj dionici koristi se samo jedna traka iz oba smjera što predstavlja opasnost za učesnike u saobraćaju, posebno u dane vikenda kad je povećana frekvencija vozila prema Ponijerima.

Branko Češljic: je pokrenuo vijećničku inicijativu da se makadamski put između pogona Haljinići i jame u Begićima asfaltira, jer teretni kamioni dižu ogromnu prašinu, posebno kad je suho vrijeme, te pomenuta prašina ugrožava kuće u naseljima koja su blizu puta.

Amar Selimović: je pokrenuo vijećničku inicijativu da se izvrše adekvatni radovi na poligonu u naselju Sopotnica i to popunjavanje zaštitne ograde iza golova, ocrtavanje terena, ako je potrebno i farbanje golova i koševa. Napomenuo je da su navedene radove prije nekoliko godina izvršili radnici Vodokoma, a po nalogu Zavoda za planiranje i izgradnju.

Namir Talić: je pokrenuo vijećničku inicijativu da se u naselju Ivnica postave novi adekvatni usporivači brzine (ležeći policajci). Naime, u proteklom periodu su postavljeni ležeći policajci u naselju Ivnica, međutim isti su neobično niski, te ne služe svojoj svrsi. Smatra da ležeći policajci trebaju da imaju za cilj usporavanje vozila, ali trenutno postavljeni su preniski i ne usporavaju vozila.

Sabit Čehajić: je pokrenuo vijećničku inicijativu da se putna komunikacija koja prolazi kroz naselje Plandište do lokalne deponije, uvrsti u budžetski kod kapitalnih ulaganja, te da se ista ne oslanja na investiranje iz programa MZ Plandište.

Edin Šljivo: je pokrenuo vijećničku inicijativu da se svim vijećnicima dostave kopije nalaza o ispravnosti vode Bukovica kojom se napaja općina Kakanj (pitka voda). Podsjetio je da je u Informaciji Vodokom o aktivnostima poduzetim u vezi otvaranja rudnika u općini Vareš, navedeno da se monitoring i analize vode na teške metale rade od augusta 2022. godine i to svaki mjesec i da su sve analize do sad bile u dozvoljenim granicama izuzev aprila 2023. godine, kada je prisustvo kadmijuma u analizi sirove vode bilo nešto iznad dozvoljenog. S toga traži da se svim vijećnicima dostave svi dosadašnji nalazi.

Utvrđivanje dnevnog reda

Predsjedavajući je za 40. redovnu sjednicu predložio dnevni red po pozivu, te je rekao da je predlagač odlučio da povuče sa dnevnog reda tačku pod rednim brojem 7. predloženog dnevnog reda „Prijedlog odluke o visini prosječne konačne građevinske cijene iz prethodne godine po m2 korisne stambene površine na području općine Kakanj“, tako da bi Vijeće raspravljalo o 11 tačaka dnevnog reda.

Predloženi dnevni red je usvojen jednoglasno sa 20 glasova ZA.

Usvojeni dnevni red

1. Izvještaj o izvršenju Budžeta Općine Kakanj za period 01.01-31.12.2023. godine
2. Izvještaj o izvršenju tekuće budžetske rezerve Budžeta Općine Kakanj za period 01.01-31.12.2023. godine
3. Prijedlog odluke o utvrđivanju javnog interesa u svrhu rekonstrukcije vodovoda Lučani u MZ Bilješevo
4. Prijedlog odluke o gubljenju statusa javnog dobra
5. Prijedlog odluke o davanju saglasnosti za provođenje dodjele koncesije za istraživanje i eksploataciju mineralnog resursa krečnjaka na lokalitetu „Borovačka stijena“ općina Kakanj
6. Prijedlog odluke o uslovima, kriterijima i postupku dodjele sredstava za sufinansiranje mjera poboljšanja energetske efikasnosti i smanjenja aerozagađenja na području općine Kakanj
7. Prijedlog odluke o izmjeni Odluke o utvrđivanju naziva ulica općine Kakanj
8. Prijedlog odluke o potvrđivanju izbora za članove Savjeta mjesne zajednice Željeznička Stanica
9. Izvještaj o radu JU „Gradska biblioteka“ Kakanj sa Izvještajem o finansijskom poslovanju za 2023. godinu
10. Program rada JU „Gradska biblioteka“ Kakanj sa Finansijskim planom za 2024. godinu
11. Informacija o realizaciji sredstava boračkim populacijama sa viših nivoa vlasti i sredstava Budžeta Općine Kakanj u skladu s Kriterijima i pozitivnim zakonskim propisima za 2023. godinu

Vijeće je vodilo objedinjenu raspravu po tačkama 1. i 2. dnevnog reda.

1. Izvještaj o izvršenju Budžeta Općine Kakanj za period 01.01-31.12.2023. godine

2. Izvještaj o izvršenju tekuće budžetske rezerve Budžeta Općine Kakanj za period 01.01-31.12.2023. godine

Predlagač: Općinski načelnik

Obrađivač: Služba za finansije

Izjestilac: Džihad Berbić, pomoćnik općinskog načelnika

U diskusiji su učestvovali: Vinka Aletović i Mirsad Tursum.

Vinka Aletović: je tražila pojašnjenje pojedinih pozicija na stavci rashodi koje se odnose na kapitalne transfere i to: transfer za izgradnju distributivne mreže vodovoda za Zagrađe, transfer Grijanju za toplifikaciju MZ Povezice, transfer za sufinansiranje radova na sanaciji klizišta na novoizgrađenoj cesti Donnji Kakanj – Kondžilo i opremanje fiksne stanice za mjerenje kvalitete zraka. Kazala je da su to stavke koje su bile planirane u prethodnoj godini i nisu realizovane, pa su prenesene za narednu godinu.

Mirsad Tursum: je komentarisao planirani transfer Domu zdravlja Kakanj za sufinansiranje specijalizacije doktora gdje je bilo planirano 50 hiljada KM, a nije realizovano ništa. S toga je pitao da li se planiraju izdvojiti sredstva za tu namjenu u tekućoj godini, pri čemu je naglasio da su u međuvremenu tri doktora upućena na specijalizaciju.

Džihad Berbić (odgovor): je vijećnici Aletović pojasnio da su navedene pozicije planirane u Budžetu na osnovu odluka viših nivoa vlasti, da se radi o namjenskim sredstvima koja nisu realizovana do 31.12. prethodne godine, pa su prenesena za realizaciju u 2024. godinu. Vijećniku Tursumu je potvrdio da su sredstva za sufinansiranje specijalizacije doktora planirana u istom iznosu u Budžetu za 2024. godinu i da se ista namjeravaju realizovati.

Nakon diskusije Vijeće je usvojilo Zaključak o prihvatanju Izvještaja o izvršenju Budžeta Općine Kakanj za period 01.01-31.12.2023. godine, sa 19 glasova ZA, bez glasova PROTIV i 5 glasova UZDRŽAN, te Zaključak o prihvatanju Izvještaja o izvršenju tekuće budžetske rezerve Budžeta Općine Kakanj za period 01.01-31.12.2023. godine, sa 18 glasova ZA, bez glasova PROTIV i 6 glasova UZDRŽAN.

3. Prijedlog odluke o utvrđivanju javnog interesa u svrhu rekonstrukcije vodovoda Lučani u MZ Bilješevo

Predlagač: Općinski načelnik

Obrađivač: Službe za imovinskopravne, geodetske poslove i katastar nekretnina i

Izjestilac: Mukades Delibašić, pomoćnik općinskog načelnika

U diskusiji nije niko učestvovao i Vijeće je jednoglasno sa 24 glasa ZA usvojilo Odluku o utvrđivanju javnog interesa u svrhu rekonstrukcije vodovoda Lučani u MZ Bilješevo.

Vijeće je vodilo objedinjenu raspravu po tačkama 4. i 5. dnevnog reda.

4. Prijedlog odluke o gubljenju statusa javnog dobra

Predlagač: Općinski načelnik

Obrađivač: Službe za imovinskopravne, geodetske poslove i katastar nekretnina i

Izjestilac: Mukades Delibašić, pomoćnik općinskog načelnika

5. Prijedlog odluke o davanju saglasnosti za provođenje dodjele koncesije za istraživanje i eksploataciju mineralnog resursa krečnjaka na lokalitetu „Borovačka stijena“ općina Kakanj

Predlagač: Općinski načelnik

Obrađivač: Služba za privredu, urbanizam i zaštitu okoline

Izjestilac: Mirza Fazlić, pomoćnik općinskog načelnika

Nedžad Rožajac: je ispred „Modus Projekt“ d.o.o. Kakanj, kao projektanta idejnog projekta pojasnio i rekao da se postojeći lokalni put u jednom dijelu nalazi unutar zone novog eksploatacionog polja. Iz tog razloga je idejnim projektom planirano izmještanje dijela lokalne ceste za naselje Kučići u dužini od cca 300 metara, pri čemu bi se nova dionica uklopila u postojeći lokalni put u gornjem dijelu istog, gdje postojeći put izlazi iz zone eksploatacionog polja.

U diskusiji su učestvovali: Sabit Čehajić i Safet Šahman.

Sabit Čehajić: je pitao da li se radi o putu za naselje Kučiće ili je u pitanju dio puta Kučići – Kondžilo? Još je pitao da li se izmještanjem prekida lokalni put Kakanj – Bijele Vode – Kondžilo, te da li su pribavljene sve saglasnosti i dozvole za izmještanje dijela puta? Kako se u obrazloženju odluke poziva na Zakon o cestama Federacije BiH i odredbu koja tretira napušteni put, pitao je da li se radi o napuštenoj cesti, jer smatra da to nije napuštena cesta?

Safet Šahman: je pitao da li se radi o dijelu koji je već iskrčen i da li će po završetku radova nova dionica biti funkcionalna u odnosu na postojeći lokalni put.

Mukades Delibašić (odgovor): je istakao da je Općina Kakanj dobila pravo služnosti od ŠPD ZDK i na osnovu iste je izdata urbanistička saglasnost. Rekao je da će po okoćanju diskusije predložiti na usvajanje zaključke kojim će se urediti odnosi (prava i obaveze) između Općine Kakanj i koncesionara „Trgošped“ d.o.o. Kakanj, a sve s ciljem da po okončanju izgradnje novog dijela puta sve bude funkcionalno.

Nedžad Rožajac (odgovor): je dodatno pojasnio situaciju oko izmještanja dijela postojećeg puta i rekao da će se prvo uraditi nova dionica puta, odnosno izmještanje trase puta na jednom dijelu sa adekvatnim tehničkim karakteristikama i kad sve to bude u potpunosti u funkciji dolazi do ukidanja dijela postojećeg puta, jer taj dio više neće imati nikakvu funkciju.

Mukades Delibašić: je Vijeću predložio na usvajanje zaključak uz Odluku o gubljenju statusa javnog dobra koji se odnose na izmještanje dijela puta u režiji koncesionara – Trgošpeda. Zaključak glasi: „Općina Kakanj će sa koncesionarom „Trgošped“ d.o.o. Kakanj pismenim sporazumom urediti međusobna prava i obaveze u vezi realizacije projekta izgradnje dijela puta koji prolazi kroz parcelu označenu kao k.č.br. 706/4 k.o. Bijele Vode, a u skladu sa zahtjevom „Trgošped“ d.o.o. Kakanj, broj: AZ-34/24 od 18.04.2024. godine, kao i urbanističke saglasnosti, broj: 04/1-19-2833/23 od 10.07.2023. godine. Izvođenje radova na proširenom lokalitetu eksploatacionog polja kamenolom „Borovačka stijena“ na parceli označenoj kao k.č.br. 3054/2 k.o. Bijele Vode neće se izvoditi dok se ne realizuje projekt izgradnje puta u skladu sa projektnom dokumentacijom i izdatim dozvolama, odnosno nakon dobijanja upotrebne dozvole za novoizgrađenu dionicu puta.“

Nakon diskusije Vijeće je usvojilo Odluku o gubljenju statusa javnog dobra sa 22 glasa ZA, bez glasova PROTIV i 1 glas UZDRŽAN, uz sljedeći Zaključak: „Općina Kakanj će sa koncesionarom „Trgošped“ d.o.o. Kakanj pismenim sporazumom urediti međusobna prava i obaveze u vezi realizacije projekta izgradnje dijela puta koji prolazi kroz parcelu označenu kao k.č.br. 706/4 k.o. Bijele Vode, a u skladu sa zahtjevom „Trgošped“ d.o.o. Kakanj, broj: AZ-34/24 od 18.04.2024. godine, kao i urbanističke saglasnosti, broj: 04/1-19-2833/23 od 10.07.2023. godine. Izvođenje radova na proširenom lokalitetu eksploatacionog polja kamenolom „Borovačka stijena“ na parceli označenoj kao k.č.br. 3054/2 k.o. Bijele Vode neće se izvoditi dok se ne realizuje projekt izgradnje puta u skladu sa projektnom dokumentacijom i izdatim dozvolama, odnosno nakon dobijanja upotrebne dozvole za novoizgrađenu dionicu puta.“ Također, Vijeće je sa 22 glasa ZA, bez glasova PROTIV i 1 glas UZDRŽAN usvojilo Odluku o davanju saglasnosti za provođenje dodjele koncesije za istraživanje i eksploataciju mineralnog resursa krečnjaka na lokalitetu „Borovačka stijena“ općina Kakanj.

6. Prijedlog odluke o uslovima, kriterijima i postupku dodjele sredstava za sufinansiranje mjera poboljšanja energetske efikasnosti i smanjenja aerozagađenja na području općine Kakanj

Predlagač: Općinski načelnik

Obrađivač: Služba za privredu, urbanizam i zaštitu okoline

Izvestilac: Mirnes Bajtarević, općinski načelnik

U diskusiji su učestvovali: Dževdet Huskić i Armin Bašić.

Dževdet Huskić: je izrazio zadovoljstvo što se predmetna odluka našla na dnevnom redu sjednice Vijeća, s tim da bi volio da je opredjeljen veći iznos sredstava za implementaciju iste. U tom smislu je izrazio nadu da će se kroz godine taj iznos povećavati. Predložio je izmjenu člana 6. tačka 2. Odluke na način da se aplikantima omogući da u toku jedne godine mogu ostvariti pravo na sufinansiranje po osnovu dvije predviđene mjere, a ne po osnovu samo jedne kako je trenutno predviđeno odlukom (npr. da se može aplicirati za sufinansiranje ugradnje toplotne pumpe i postavljanja toplotne izolacije na objekat.

Armin Bašić: je također izrazio zadovoljstvo predloženom odlukom uz nadu da će narednih godina iznos za realizaciju odluke biti veći. Sugerisao je da bi dobro bilo u odluci, u dijelu koji govori o potrebnoj dokumentaciji za aplikaciju, izmjeniti uslove na način da je dovoljno priložiti jedan račun za električnu energiju na ime podnosioca aplikacije, a ne tri računa kako je odlukom propisano.

Općinski načelnik (odgovor): je rekao da je ideja da se omogući većem broju korisnika da ostvare pravo na sufinansiranje, pa je s toga propisano da se u toku jedne godine može ostvariti pravo na sufinansiranje po osnovu samo jedne mjere, obzirom da su za realizaciju odluke predviđena relativno skromna sredstva. Ukoliko bi se prihvatio prijedlog vijećnika Huskića moglo bi se desiti da pojedini korisnici ostvare pravo na sufinansiranje po osnovu dvije mjere, dok drugi (lošije rangirani) ne bi mogli dobiti ništa. Za prijedlog vijećnika Bašića je rekao da ga nije razumio, ali je u tom pogledu rekao da račun za električnu energiju mora da glase na isto lice na koje glasi i građevinska dozvola za objekat. Još je napomenuo da će Općina Kakanj, nakon provedenog javnog poziva i formiranja liste, uraditi energetske audit za objekte za koje isti ne bude izrađen, a sve iz razloga kako građani ne bi samovoljno odlučivali koju vrstu i kvalitet fasade da ugrade na objekat, odnosno kako bi se struka maksimalno uključila u proces odobravanja sredstava za sufinansiranje.

Armin Bašić (replika): je pojasnio svoj prijedlog i rekao da predlaže da se u članu 5. tačka b) od podnosioca prijave traži da priloži račun za električnu energiju za najmanje jedan mjesec, a ne za tri mjeseca kako se nalazi u prijedlugu odluke. Naveo je primjer u slučaju da je objekat tek sagrađen i da podnosilac prijave nema račune za električnu energiju za tri mjeseca, pa iz tog razloga ne bi mogao aplicirati, smatra da bi korisno bilo kao uslov postaviti da se priloži račun za električnu energiju minimalno za jedan mjesec.

Općinski načelnik (odgovor): se složio sa prijedlogom vijećnika Bašića tako da član 5. tačka b) odluke glasi: „fotokopiju računa za uslugu snabdijevanja električnom energijom za period od najmanje jedan mjesec prije objave javnog poziva, u iznosu ne manjem od 100 kWh mjesečno“.

Nakon diskusije Vijeće je usvojilo Odluku o uslovima, kriterijima i postupku dodjele sredstava za sufinansiranje mjera poboljšanja energetske efikasnosti i smanjenja aerozagađenja na području općine Kakanj, uz prihvaćenu izmjenu u članu 5. Odluke po prijedlogu vijećnika Bašića, sa 21 glasom ZA, bez glasova PROTIV i 3 glasa UZDRŽAN.

7. Prijedlog odluke o izmjeni Odluke o utvrđivanju naziva ulica općine Kakanj

Predlagač: Općinski načelnik

Obradivač: Komisija za utvrđivanje kriterija, postupka, načinu davanja i izmjena naziva ulica...

Izjavitelj: Sedin Karahodžić, predsjednik Komisije

U diskusiji niko nije učestvovao, a prijedlog odluke o izmjeni Odluke o utvrđivanju naziva ulica općine Kakanj nije dobio potrebnu većinu sa 9 glasova ZA, 2 glasa PROTIV i 12 glasova UZDRŽAN.

8. Prijedlog odluke o potvrđivanju izbora za članove Savjeta mjesne zajednice Željeznička Stanica

Predlagač: Općinski načelnik

Obradivač: Komisija za utvrđivanje kriterija, postupka, načinu davanja i izmjena naziva ulica...

Izjavitelj: Sedin Karahodžić, predsjednik Komisije

U diskusiji nije niko učestvovao i Vijeće je usvojilo Odluku o potvrđivanju izbora za članove Savjeta mjesne zajednice Željeznička Stanica sa 18 glasova ZA, bez glasova PROTIV i 4 glasa UZDRŽAN.

Vijeće je vodilo objedinjenu raspravu po tačkama 9. i 10. dnevnog reda.

9. Izvještaj o radu JU „Gradska biblioteka“ Kakanj sa Izvještajem o finansijskom poslovanju za 2023. godinu

10. Program rada JU „Gradska biblioteka“ Kakanj sa Finansijskim planom za 2024. godinu

Predlagač: UO JU „Gradska biblioteka“ Kakanj

Obradivač: UO JU „Gradska biblioteka“ Kakanj

Izjestilac: Sanda Hasagić-Terzić, predsjednica UO JU i Senad Čišija, direktor JU „Gradska biblioteka“ Kakanj

U diskusiji nije niko učestvovao i Vijeće je jednoglasno sa 24 glasa ZA usvojilo Zaključak o prihvatanju Izvještaja o radu JU „Gradska biblioteka“ Kakanj sa Izvještajem o finansijskom poslovanju za 2023. godinu, te Zaključak o davanju saglasnosti na Program rada JU „Gradska biblioteka“ Kakanj sa Finansijskim planom za 2024. godinu.

11. Informacija o realizaciji sredstava boračkim populacijama sa viših nivoa vlasti i sredstava Budžeta Općine Kakanj u skladu s Kriterijima i pozitivnim zakonskim propisima za 2023. godinu

Predlagač: Općinski načelnik

Obradivač: Služba za društvene djelatnosti, boračka pitanja, raseljena lica, izbjeglice i povratnike

Izjestilac: Edin Aliefendić, pomoćnik općinskog načelnika

U diskusiji nije niko učestvovao i Vijeće je jednoglasno sa 24 glasa ZA usvojilo Zaključak o primanju k znanju Informacije o realizaciji sredstava boračkim populacijama sa viših nivoa vlasti i sredstava Budžeta Općine Kakanj u skladu s Kriterijima i pozitivnim zakonskim propisima za 2023. godinu.

Predsjedavajući je zaključio rad 40. redovne sjednice Općinskog vijeća u 11:05 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**

-po ovlaštenju-
Emir Zaimović

**PREDSJEDAVAJUĆI
OPĆINSKOG VIJEĆA**

Slaven Katičić